

鄧州志卷之二十二

古延蔣光祖振裘氏纂修

藝文上

文章自左國一變而爲史漢再變而爲八家其精神
氣脉雖一綫相接而規模體制固已迥然一新韓吏
部起八代衰居八家首後世爲古文辭多宗之唐詩
首推工部李翰林外亦有以韓並稱者鄧之詩文所
從來遠矣韓集不可勝書取其爲鄧人鄧事者載之
亦九鼎一嚮也餘或其文可傳或其人足重抑或其
事當紀並錄於篇要皆各有所長自極一時之選云



爾志藝文

詔誥

漢孝武皇帝封霍去病冠軍侯詔

剽姚校尉去病斬首虜二千二十八級及相國當戶斬單于大父行籍若侯產生捕季父羅姑比再冠軍以千六百戶封去病爲冠軍侯

益封冠軍侯詔

驃騎將軍率戎士踰烏盭討遼濮涉狐奴歷五王國輜重人衆懾懼者弗取冀獲單于子轉戰六日過焉支山千有餘里合短兵殺折蘭王斬盧胡王誅全甲執渾邪王子及

相國都尉首虜八千餘級收休屠祭天金人益封去病二千戶

又

驃騎將軍踰居延遂過小月氏攻祁連山得酋涂王以衆降者二千五百人斬首虜三萬二百級獲五王五王母單于闐氏王子五十九人相國將軍當戶都尉六十三人師大率減什三益封去病五千戶

又

驃騎將軍去病率師攻匈奴西域王渾邪王及厥衆萌咸相犇率以軍糧接食並將控弦萬有餘人誅獍驛獲首虜

八千餘級降異國之主三十二人戰士不離傷十萬之衆咸懷集服仍與之勞爰及河塞庶幾無患幸旣永綏矣以千七百戶益封驃騎將軍減隴西北地上郡戍卒之半以寬天下之繇

又

驃騎將軍去病率師躬將所獲輦粥之士約輕齎絕大幕涉獲章渠以誅比車者轉擊左大將斬獲旗鼓歷涉離侯濟弓闔獲屯頭王韓王等三人將軍相國當戶都尉八十二人封狼居胥山禪於姑衍登臨翰海執鹵獲醜七萬有四百四十三級師率減什三取食於敵遵行殊遠而糧不

絕以五千八百戶益封驃騎將軍

宋哲宗皇帝賜資政殿學士知鄧州韓維進奉謝恩

馬詔

勅韓維廟堂均逸遠不忘君駟駿在庭儀多於物載惟忠
盡良極歎咨

明李昇誥命一道

皇帝制曰德以教子之忠壽以膺主之錫至於保傅鄰於
期頤此古之所希而我之所臣也咨爾封榮祿大夫少保
吏部尚書兼華蓋殿大學士李昇乃光祿大夫柱國少保
吏部尚書兼華蓋殿大學士李賢之父老成恬退惇厚弘

深不以遺金滿籩爲資故相業在其嗣不以橫玉紆緝爲
侈故仙齡集其躬昔者漢相建之父奮稱萬石君宋相溥
之父祚號十阿父與爾相望愜予所懷今特加封爾爲光
祿大夫柱國少保吏部尙書兼華蓋殿大學士爾其尙能
服以拜恩杖而造闕觀予君臣太平之共致彰爾父子景
福之全膺欽哉

制曰相其夫而不偕其老成其子而不享其榮雖繫罔極
之恩然留有餘之福爾贈一品夫人葉氏乃光祿太夫桂
國少保吏部尙書兼華蓋殿大學士李賢之母體齊耆俊
賓敬如梁鴻之妻娠育元台幼誨如純仁之母然而音徽

久掩於楸壠則範徒存於萱闈朕方孝治是圖輔弼是賴而不隆恩典於所自其可乎哉今特重頒誥命以示寵褒異數之有加倍淑德之彌著服此嘉命永慰重泉

制曰孝子之事繼母同於親母國家之待大臣優於群臣故推予恩以光其孝爾封一品夫人常氏乃光祿大夫柱國吏部尚書兼華蓋殿大學士李賢繼母配鶴髮之遺老侔鳩鳩之均仁門滿簪弁養同茵鼎今特重頒誥命以示褒嘉其益勉於順慈以克綿於福祉

明大學士李賢誥命一道

皇帝制曰朕惟天降偉材必爲匡世之用君資良弼尤在

建極之初夫然後治道以隆主德以進蓋將以熙萬物而
豈但獎一臣哉咨爾榮祿大夫少保吏部尙書兼華蓋殿
大學士李賢賦性高明受才宏博其勝重任爲當代之棟
梁其炳先幾爲群僚之著蔡是以際宣廟而早播縉紳之
譽事英考而洊付鼎鉉之調鳴鳳飛騫止於蓬島從龍啟
沃來於潛淵逮茲訪落之時爰加寅亮之職俾其仍冠經
席以闡宣尼之微言兼總史權以裁放勲之大典贊予初
政屹我中樞今特進階光祿大夫柱國用表殊恩於巖商
湯先學而後臣故傳祚六百祀周成左旦而右奭故措刑
四十年卿其益懋乃忠益堅乃操以登厥辟於徃古之盛

亦以昭卿譽於永世之垂欽哉

制曰婦人從夫於隱約之年而不惜老於顯榮之日良可致嘆也矧當推榮哉爾贈夫人黃氏乃光祿大夫柱國少保吏部尙書兼華蓋殿大學士李賢之妻夙詠宜家之章中貽斷絃之戚命固有制誼則靡忘今特加贈爲一品夫人尙欽予命以佑爾家

制曰臣以相於國妻以相於家其業各殊其理共貫爾封夫人周氏乃光祿大夫柱國少保吏部尙書兼華蓋殿大學士李賢之繼室旣莊而靜亦儉以勤配我國老閑於家規俾無內顧之懷以隆上輔之績今特加封爲一品夫人

其尙敦鵲巢之懿德承關雎之美化式副予訓益永厥榮
明諭祭太師李賢文

皇帝遣禮部尙書_人夔諭祭少保吏部尙書_人華蓋殿大
學士贈特進光祿大夫左柱國太師諡文_人李賢曰卿以
警悟之資博雅之學竒偉之器通_人之材事我皇考受知
惟深日重倚毗詢納嘉言以增治道繼嗣承大統於今三
年卿以夙德重望輔政以忠勤講學_人要領而寅亮之功
啟沃之益多所賴焉方期永益以臻至治奈何偶罹於疾
奄爾遐棄慨上天之不懲遺想生容之不再見其哀悼曷
能已哉今特贈卿特進光祿大夫左柱國太師謚文達仍

命有司歸喪營葬復遣致祭用著朕篤念之意靈其不昧
尚歆享之

皇清贈中憲大夫彭彬誥命一道

皇帝制曰功隆賞懋式弘錫類之仁積厚光流必溯貽謀之

澤榮名上逮義門彌章爾贈中憲大夫雲南按察司副使

彭彬乃經筵講官內閣學士兼禮部侍郎教習庶吉士彭

始搏之祖父作室基先開祥祿後一經代授傳家澤衍縉

組再世寢昌匡國名高黼黻興宗兆叶縻爵階崇茲以覃

恩贈爾爲通議大夫經筵講官內閣學士兼禮部侍郎教

習庶吉士錫之誥命於戲良臣懋績實承舊德之光大父

登州志 卷之二十一
蒙恩丕煥新綸之采式承休渥庶慰顯揚

制曰職崇朝宁嘉丕績於良臣澤沛綸章推鴻慈於大母重
闡錫慶累世承庥爾經筵講官內閣學士兼禮部侍郎教
習庶吉士彭始搏之祖母原贈恭人王氏執儀嫺習風範
淑嘉主饋宜家啟再傳之令緒含飴裕後遂三錫之寵光
啟佑有原恩施宜沛茲以覃恩贈爾爲太淑人於戲芳規
未邈尙貽昌大於方來寵賚仍加庶保昭融於罔斁用酬
母訓永荷王綸

皇清詔授通議大夫彭而述誥命一道

皇帝制曰華胄清資佑啟必原於嚴父令儀碩望蕃昌

於名門爰煥國恩用彰家訓爾原任雲南右布政使管左
布政使事彭而述乃經筵講官內閣學士兼禮部侍郎教
習庶吉士彭始搏之父操修醇粹啟迪勤劬儒席傳珍琢
就珪璋之器良材肯構蔚爲臺閣之英門祚方新寵章洊
被茲特晉階贈爾爲通奉大夫經筵講官內閣學士兼禮
部侍郎教習庶吉士錫之誥命於戲承家有子聿昭學治
之風被命自天用作義方之勸式承茂獎追念德音

制曰推恩邇本爰錫慶於親闈稟訓入官並歸功於母教式
頒渥典用播嘉聲爾經筵講官內閣學士兼禮部侍郎教
習庶吉士彭始搏之母原贈恭人王氏順以承夫勤於課

子宅能三徙夙成俎豆之容織就七襄早振文章之緒徽
音久著寵命宜加茲以覃恩加贈爲太夫人於戲鴻章疊
布尙伸慈孝之思闡澤長流彌篤令共之誼廣宣休問永
樹芳儀

諭祭都司張奎文

順治十三年

皇帝遣河南布政司堂上官分守汝南道右叅政桑芸

諭祭故都司僉書贈正都司張奎之靈曰鞠躬盡瘁者臣子
之芳踪卹死報勤者國家之盛典爾張奎賦性忠直國而
忘身禦敵衝鋒被創殞命朕甚悼焉特頒牲醴用慰幽魂
爾如有知尙其歆此

諭祭雲南左布政使彭而述文

康熙六年

皇帝遣河南布政司分守汝南道叅議楊志遠

諭祭故原任雲南等處承宣布政使司左布政使彭而述之
靈曰鞠躬盡瘁臣子之芳踪卹死報勤國家之盛典爾彭
而述性行純良才能稱職履任服官歷有年所方冀遐齡
忽焉奄逝朕用悼焉特頒祭葬以慰幽魂嗚呼聿垂不朽
之榮庶享匪躬之報爾如有知尙克歆享

表奏

上太宗勤政疏

唐
岑文本

州人

臣聞關撥亂之業其功旣難守已成之基其道不易故居

安思危所以定其業也有始有卒所以崇其基也今雖億兆又安方隅寧謐旣承喪亂之後又接凋弊之餘戶口減捐尙多田疇墾闢猶少覆燾之恩著矣而瘡痍未復德教之風被矣而資產屢空是以古人譬之種樹年祀綿遠則枝葉扶疎若種之日淺根本未固雖壅之以黑壤暖之以春日一人搖之必致枯槁今之百姓頗類於此常加含養則日就滋息暫有征役則隨日凋耗凋耗旣甚則人不聊生人不聊生則怨氣克塞怨氣克塞則離叛之心生矣故帝舜曰可愛非君可畏非民孔安國曰人以君爲命故可畏君失道人叛之故可畏仲尼曰君猶舟也人猶水也水

所以載舟亦所以覆舟是以古之哲王雖休勿休日慎一日者良爲此也伏惟陛下覽古今之事察安危之機上以社稷爲重下以億兆在念明選舉慎賞罰進賢才退不肖聞過卽改從諫如流爲善在於不疑出令期於必信顧神養性省游畋之娛去奢從儉減工役之費務靜方內而不求闢土載橐弓矢而無忘武備凡此數者雖爲國家之恒道陛下之所常行臣之愚昧惟願陛下思而不怠則至道之美與三王比隆億載之祥與天地長久雖使桑穀爲妖龍蛇作孽雖雖於鼎耳石言於晉地猶當轉禍爲福變災爲祥臣聞古人有言農夫勞而君子養焉愚者言而智者